



Äntwert vun der Ministesch fir Konsumenteschutz, vum Minister fir d'Fonction publique an vun der Ministesch fir Ëmwelt, Klima an nohalteg Entwécklung op d'parlamentaresch Fro n° 6015 vum 1. Abrëll 2022 vum Här Deputéierten Marc Goergen.

1. Wéi vill Tonne Kleeder ginn zu Lëtzebuerg all Joers: recycléiert? verbrannt? aussortéiert an an d'Ausland exportéiert?

De Konsumenteschutzministère féiert keng Statistiken iwwert dëse Beräich awer en hat zesumme mat Caritas am Januar 2022 eng kleng Analys zu dem Flux vun den Textilien gemaach a probéiert dat Datematerial wat zu Lëtzebuerg besteet an och zougänglech ass zesummen ze leen. Mat dësen Donnéeën ass et awer just zum Deel méiglech ob déi hei gestallte Froen z'äntweren.

D'Analys kuckt wéi eng „Textilien“ (also net just Kleeder) mat dem Objektiv vun enger „réutilisation, engem Recyclage an engem upcycling“ gesammelt ginn. Fir 2018 waren et 5256 Tonnen déi en vu vun sou enger Valorisation gesammelt gi sinn. De gréissten Deel (78%) gëtt vun AEHGD a Kolping –Jongenheem gesammelt déi des dann integral an d'Ausland weiderginn un Entreprises déi am Tri an an der Revente schaffen. Des Textilien ginn also net zu Lëtzebuerg recycléiert mee just gesammelt.

Et ginn och nach 2 198 Tonne „déchets textiles“ an de Poubellë bei de „déchets ménagers“ gezielt. Déchets ménagers résiduels vum SIGRE a SIDOR gi beim SIDOR verbrannt ouni dass do nach en Tri virdru gemaach gëtt. Ob Basis vun den Estimatiounen an der Etude ginn 1925 Tonne verbrannt a 273 Tonnen ewechgeheit. Hei den Tableau deen déi entspreichend Kategorië rëmgëtt. Déi ganz Etude fënnt een ënnert folgendem Link:

<https://www.caritas.lu/caritas-news/actualites/les-flux-de-textiles>

Tableau 3: Destination des textiles à valoriser et à éliminer au Luxembourg, 2018, en tonnes

| | 2018 |
|--|--------------|
| Upcycling au Luxembourg (BENU) | 1,3 |
| Distribution caritative au Luxembourg (Spëndchen et Stëmm vun der Strooss) | 133 |
| Marchés des vêtements seconde main à l'étranger | 2.301 |
| Recyclage à l'étranger | 1.474 |
| Incinération au Luxembourg | 1.925 |
| Mise en décharge au Luxembourg | 272 |
| Décharge / incinération à l'étranger | 376 |
| Inconnu | 970 |
| Total | 7.454 |

2. Wéi vill Second-Hand-Butteker am Kleederberäich ginn et aktuell zu Lëtzebuerg?

Ob Basis vun dem Code NACE 47.799 deen all Butteker mat Biens d'occasion regroupéiert ass et net méiglech genee eraus ze fanne wivill Second-Hand Butteker et am Kleederberäich ginn. Fir 2019 fënnt een an der genannter Kategorie 25 Butteker déi sech wéi gesot net eleng ob Kleeder bezéien.

Et ginn awer och aner Kanäl iwwert déi ee Second-Hand Kleeder ka kafen oder kréien, sief et am professionellen oder am private Beräich. Dëst weist eng Ëmfro iwwert de Réemploi déi den TNS Ilres 2021 fir d'Ëmweltverwaltung gemaach huet. D'Resultater dovunner kann een hei fannen: <https://environnement.public.lu/fr/actualites/2021/10/reemploi-tns.html>

Do weist sech datt Internet Plattformen, Online Handel an Hëllefss-a.s.b.l.'en zousätzlech Plazen si wou ee Kleeder a Schong ka kafen oder gratis kréien, nieft de private Don'en di di éischt Quell vu Second-Handwuere sinn. Et stellt sech och eraus datt d'Leit wéineg Kleeder ewechgeheien, well se di meescht dovunner an eng Sammelstell ofginn (al Kleedersammlungen, Recyclingcenter, Second-Hand shop...), u Bekannte weiderginn oder verkafen.

3. Wat fir Measure gesäit d'Regierung vir, fir de Kleederkonsum zu Lëtzebuerg méi nohalteg ze gestalten?

De Ministère fir Konsumenteschutz mécht bis elo Informatioun a Sensibilisatioun an deem Beräich an huet och fir Zukunft weider geplangt dorunner ze schaffen. Desweidere mécht hien de Suivi vu verschidden neien europäesche legislative Propositionen an och net legislativen Initiativen.

Et gëtt och eng Ënnerdeelung fir Kleeder an Textilien am EU-Ecolabel, mat spezifesch Krittären di opgebaut goufen. Dësen EU-Ecolabel ka natierlech och op fräiwëlleger Basis hei zu Lëtzebuerg ugewannt ginn.

Fir mi wäit ze goen ass am Mäerz 2022 d'Textilie-Strategie vun der europäescher Commissioun ([EU strategy for sustainable and circular textiles](#)) publizéiert ginn. Se gesäit vir datt den Design vun den Textilie wäert verbessert ginn, am Sënn vu méi Nohaltegkeet (Liewensdauer/Qualitéit, sozial Aspekter an der Hierstellung...) a besser Offallentsuergung (Weiderbenotzung, Recycling). Den Opbau vun harmoniséierte Krittäre fir d'Produzenteverantwortungssystemer fir Textilien an der Offalkaderdirektive ass och virgesinn; deemno wéi wäert den Opbau vun esou engem System zu Lëtzebuerg pertinent sinn .

No der Publikatioun vun dëser Textilie-Strategie fänken d'Aarbechten um EU-Niveau un, fir dës Strategie konkret ëmzesetzen.. Des Aarbechten wäerten interministeriell mat dem Ministère fir Emweltschutz, Klima a Nohaltegkeet suivéiert a koordinéiert ginn fir d'Ëmsetzung dovunner um nationalen Niveau z'erméiglechen..

4. Wéi steet d'Regierung zu engem Pfandsystem fir Kleedungsstécker, fir esou d'Kleeder an engem zouene Kreeslaf ze halen?

D'Machbarkeet vun engem Pfandsystem muss hei zu Lëtzebuerg fir d'éischt analyséiert ginn, besonnesch fir d'Problematik vum Import vun de Wuere mat an Uecht ze huelen. Am Fall wou e Produzenteverantwortungssystem zu Lëtzebuerg fir Textilien opgebaut géif ginn, wéi d'EU-Strategie et recommandéiert, kéint een eng "obligation de reprise" abaue fir di Offäll, wéi et dat scho fir Verpackungen, Batterien oder Elektroschrott gëtt. Dës "obligation de reprise" kéint eventuell änlech wéi e Pfand-system funktionéiere wann d'Textilieproduzenten dat esou virgesinn.

Fir eng gesetzeskonform Offallgestioun vun deenen Offäll ze garantéiere steet eng Dispositioun am zukünftigen Artikel 13 vum Offalkadergesetz ([projet de loi n°7659](#)). Et geet ëm promotionell Sammelkampagnen, déi vum wirtschafleche Secteur organiséiert ginn. Wann e Geschäft al Kleeder, Schong oder Textilien unhëlt, wäert e mussen seng Campagne am Virus bei der Ëmweltverwaltung umellen a wäert nodréiglech d'Informatiounen iwwert di konform Verwäertung, d'Quantitéiten an d'Certificaten eraschécke mussen.

Ausserdeem wäert di separat Sammlung vun Textilien als Verflichtung am Artikel 13 vun deem Gesetz verankert sinn ; wéi all separat Sammlung soll den Zweck dovunner d'Opbereedung zur Weiderbenotzung sinn oder en qualitativen héichwäertege Recycling.

5. Wéi eng Servicer vum Staat kréien Aarbechtskleeder zur Verfügung gestallt? Wéi vill Leit kréien insgesamt doduerch Aarbechtskleeder zur Verfügung gestallt? A wéi engem Ofstand ginn dës Aarbechtskleeder ersat? Wat geschitt mat dëse Kleeder no hirem Gebrauch? Entsprangen all dës Aarbechtskleeder engem nohaltege Produktiounsprozess? Wa jo, em wéi eng Marken a Label handelt et sech? Wann net, gedenkt d'Regierung an Zukunft Aarbechtskleeder aus nohaltege Produktiounsprozesser ze kafen oder op recycléiert Kleeder zeréckzegräifen?

Fir eng Äntwert op déi lescht Fro, biede mir den honorabelen Deputéierte d'Äntwert op d'parlamentaresch Fro n°4149 vum 23/04/2021 « Tenues de travail équitables et durables au sein des structures relevant de l'État », nozeliesen.

Lëtzebuerg, den 16/05/2022.

D'Ministesch fir Konsumenteschutz

(s.) Paulette LENERT